

MEGA • 20

UTUSAN MALAYSIA • ISIN 19 OKTOBER 2015

kampus

# Uniten KSHAS nadi pembangunan Muadzam

MOHAMAD SHOFI MAT ISA  
shofi.isa@utusan.com.my

**S**EJAK ditubuhkan pada 15 Februari 2001, Universiti Tenaga Nasional (Uniten) Kampus Sultan Haji Ahmad Shah (KSHAS) Muadzam Shah, Rompin dekat sini telah pun mempunyai perancangan jangka panjang bagi menjadikan institusi pengajian tinggi (IPT) itu sebagai antara pilihan pelajar di negara ini.

Jika dilihat kepada enrolmen penuntutnya, pusat pengajian itu kini mempunyai jumlah penuntut seramai 3,934 orang yang sedang mengikuti program di peringkat sarjana, sarjana muda, diploma dan program asas.

Daripada jumlah itu, 81 peratus terdiri daripada kaum Melayu, India (16 peratus) dan Cina dan kaum lain (tiga peratus) selain mempunyai 16 orang penuntut antarabangsa yang terdiri dari negara Arab Saudi, Sudan, India, Somalia, Myanmar, Vietnam, Nepal, Thailand dan Bostwana.

Selain melahirkan graduan yang holistik dan modal insan berkualiti untuk negara, Uniten KSHAS juga merupakan nadi kepada pembangunan di Muadzam Shah dan Rompin yang kini semakin membangun dengan pesatnya melibatkan aspek ekonomi dan sosial.



KEWUJUDAN KSHAS di Muadzam Shah turut menyumbang kepada pembangunan ekonomi di kawasan sekitarnya.

Timbalan Naib Canselornya, Prof. Dr. Salina Daud berkata, dari segi ekonomi, Uniten KSHAS telah menyediakan peluang perniagaan dan perkara ini dapat dilihat dengan terbinanya pusat-pusat perniagaan yang pesat dan berkembang maju.

Selain itu katanya, penubuhan IPT tersebut juga menyediakan peluang

pekerjaan kepada masyarakat tempatan di kawasan berkenaan dengan 27 peratus kakitangan universiti tersebut adalah dari sekitar Muadzam Shah.

"Dari segi peluang pekerjaan juga, Uniten KSHAS mewujudkan peluang latihan industri bagi penuntut IPT dan memberi keutamaan pengisian jawatan kepada warga tempatan," katanya.

Katanya, pendapatan peniaga tempatan di Muadzam Shah juga meningkat selepas kuasa beli pengguna meningkat selari dengan peningkatan bilangan penuntut di situ.

"Nilai hartanah di sini juga meningkat apabila Muadzam Shah sekarang menjadi tumpuan pelabur dari beberapa negeri dengan kewujudan Bandar Satelit, selain itu sektor perniagaan seperti perhotelan, rumah tumpangan, perumahan dan restoran juga bertumbuh.

"Apabila semua ini mencatatkan peningkatan pendapatan kerajaan negeri juga meningkat hasil

kutipan cukai tanah dan taksiran," katanya.

Dari segi sosial pula katanya, kewujudan Uniten KSHAS menajana pembangunan sosial dengan memperkasa keupayaan komuniti, pendidikan dan alam sekitar.

"Hasil pengembangan peluang perniagaan dan pendapatan, terdapat perubahan dari segi gaya hidup penduduk tempatan yang mana kini mereka lebih terdedah dengan penggunaan teknologi jalur lebar," katanya.

Beliau dalam pada itu berkata, kampus Uniten KSHAS di Bandar Muadzam Shah ini dibangunkan dengan konsep bandar universiti yang mana universiti dan komuniti setempat berinteraksi dalam banyak perkara.

Katanya, universiti bukan hanya sebuah 'Menara Gading' yang terasing daripada komuniti sebaliknya banyak program dilaksanakan IPT itu dengan masyarakat antaranya, program gotong royong, program kecemerlangan pelajar di sekolah angkat Uniten dan program mengenali kehidupan di alam kampus kepada para pelajar sekolah.

"Juga tidak dilupakan program yang dianjurkan untuk masyarakat Orang Asli, kelas bahasa Inggeris, program motivasi dan program Lestari Didik Orang Asli," katanya.

Katanya, masyarakat setempat termasuk parti politik boleh menggunakan kemudahan Uniten seperti auditorium, dewan kuliah, gelanggang futsal untuk aktiviti mereka.

Mengenai harapan universiti itu, Dr. Salina berkata, pihaknya berharap Uniten KSHAS menjadi sebuah Kolej Perniagaan yang terunggul di Pantai Timur dan tersohor di rantau Asia.

"Diharap universiti ini dapat menajana ekonomi negara melalui pertumbuhan pesat pembangunan ekonomi dan sosial Muadzam Shah dengan pertambahan bilangan pelajar," katanya.

